

四庫全書

集部

欽定四庫全書

集部

蘇詩補註卷三十六

詳校官庶吉士_臣李傳熊

檢討_臣何思鈞覆勘

總校官原任中允_臣王燕緒

校對官中書_臣王家賓

謄錄監生_臣胡念祖

欽定四庫全書

蘇詩補註卷三十六

翰林院編修查慎行撰

古今體詩六十五首

起元祐壬申秋抄自揚州召還為兵部尚書尋遷禮部尚書至

明年癸酉九月
出京以前作

召還至都門先寄子由

老身倦馬河堤永踏盡黃榆綠槐影荒難號月末三更

客夢還家時一頃歸老江湖無歲月未填溝壑猶朝請

黃門殿中奏

別作
春訛

事罷詔許來迎先出省已飛青蓋在

河梁定餉黃封兼賜茗遠來無物可相贈一味豐年說

淮頽

王暉道山清話云劉貢父一日問子瞻踏盡黃榆綠
槐影是日影耶月影耶子瞻曰竹影金鎖碎又何嘗
說日月也○慎按先生與貢父同朝在元祐初集中
多唱酬之什自己已已出守杭州以後絕無一語及貢
父者意此時貢父已歿道
山清話云云不足據也

附子由次韻

兄詩有味劇雋永和者僅同如畫影短篇泉列不
容挹長韻風吹忽千頃經年淮海定成集走書道

路未遑請相思夜半發清唱醉墨平明照東省

自注

詩到適在省中

南來應帶蜀岡泉西信近得蒙山茗出郊

一飯歡有餘去歲此時初到潁

次韻定國見寄

還朝如夢中雙闕眩金碧復穿鴛鴦行強寄麋鹿迹勞

生苦晝短展轉不能夕默坐數更鼓流水夜自逆故人

為我謀此志何由畢越吟知聽否誰念病莊舄

公自注時方請

越

次韻蔣穎叔錢穆父從駕景靈宮二首

歸來病鶴記城闌，舊踏松枝雨露新。半白不差垂領髮，

軟紅猶戀屬車塵。

公自注：前輩戲語，有西湖風月不如東華軟紅香土。

雨收九陌

豐登後日麗三元，下降辰粗識君王為民意。不才何以

助精裡

蔣穎叔

名之奇，注見前。

錢穆父

名勰，注見前。時為戶部尚書。

景靈宮

宋史禮志

東西景靈二宮，於祥符五年在端禮街之東西置。藝祖以下，御容於內，因學紀聞，景靈宮之為原廟。自元豐五年始，前此帝九陌。太平寰宇記：引三輔舊事，后神御寓佛老之祠。云長安城中八街九陌。

三元

徐陵文三元肇慶六呂司春

按藜藿野人詩話云東坡自揚州召還有和韻從駕景靈宮詩王仲至和之末云誰知第七車中客天遣歸來助慶裡蓋張寬四川人自揚州守召東坡亦然漢武帝郊祀回至渭橋見婦人洗乳於水上遣問之婦人曰第七車中客知我也上使問張寬寬奏曰天上長乳星祭祀不潔則見東坡時為兵部尚書亦乘車在駕前云云按蔣錢原作同時和者尚多原作既不可得仲至詩惜止傳末二句附志於此

與君並直記初元白首還同入禁門玉殿齊班容小語

霜廷稽首泣微溫

公自注適與穆父並拜庭中地皆流濕相與小語道之

病貪賜

茗浮銅葉老怯秋

一作香

泉灩寶樽回首鷄行有人傑坐

知羗虜是遊魂

並直初元

按元祐元年穆父自鹽鐵判官召為中書舍人黃山谷和穆父猩猩毛筆詩自注云

時蘇錢二公俱直紫微閣任淵山谷詩注時二公皆作中書舍人是年九月東坡方轉翰林學士銅

葉

程大昌演繁露御前賜茶皆不用建盞用大湯甌其製像銅葉湯甌耳銅葉褐色也人傑蔣

穎叔時穎叔新除熙河帥故結句云然注見本卷後

憶江南寄純如五首

楚水別來十載蜀山望斷千重畢竟擬為儋父憑君說

與吳儂

純如

姓名失考

湖目也堪供眼木奴自足為生若話三吳勝事不惟千

里蓴羹

湖目

蓮子也

千里

名勝志溧陽有蓴湖又名千里湖在縣南

人在畫屏中住客依明月邊遊未卜柴桑舊宅須乘五

馬

一作湖扁舟

五湖扁舟

後漢隗囂傳方望以書辭囂曰范蠡收責句踐乘扁舟於五湖

生計曾無聚沫孤蹤漫有清風治產猶嫌范蠡攜孥頗

笑梁鴻

弱累已償俗盡老身將伴僧居未許李鷹高潔秋風直
為鱸魚

慎按以上五首施氏原本不載新刻本載續
補卷末据外集揚州還朝後作今改編

近以月石硯屏獻子功中書公復以涵星硯獻純
父侍講子功有詩純父末也復以月石風林屏贈
之謹和子功詩并求純父數句

紫潭出玄雲翳我潭中星獨有潭上月倒掛紫翠屏我

老不看書默坐養此昏花睛時時一開眼見此雲月眼

自明久知世界一泡影大小真偽何足評笑彼三子歐

梅蘇無事自作雪羽爭

公自注事見三人詩集

故將屏硯送兩范

要使珠璧栖窗櫺大范忽長謠語出月脇令人驚

公自注皇

甫湜顧況集序云穿天心出月脇意外驚人語非尋常

小范當繼之說破星心如

雞鳴

公自注孟郊聞雞詩似開孤月口能說落星心

牀頭復一月下有風林橫

急送小范家護此涵星泓願從少陵博一句山木盡與

洪濤傾

月石屏

本集雜記一則云月石屏捫之月微凸乃偽也真者必平然多不圓圓而平至難得可寶也

子功中書

宋史范百祿字子功鎮兄錯之子第進士又舉才識兼茂科東都事畧范百祿中制

科元祐中知開封府召入翰林拜中書侍郎所著詩傳文集內外制奏議八十卷後與黨籍純父

侍講

東都事畧范祖禹傳祖禹初字夢得又字純父哲宗即位由秘書省正字遷著作郎兼侍講蘇

軾稱為講官第一宋史祖禹初擢右正言拜翰林學士以叔百祿在中書改侍講學士百祿去乃復為之

○慎按東都事畧云祖禹少孤育於叔祖景仁復齋漫錄訛以祖禹為百祿之子不知純父乃子功之姪

也故耦三子歐陽永叔有鷄石屏歌蘇子美有為小范三子月石硯歌梅聖俞有和詩不具錄

慎按月脇星心下所引皇甫湜序孟郊詩
宋刊本皆公自注云云今據此為改正

次韻范純父涵星硯月石風林屏詩

月次於房歷三星斗牛不神箕獨靈簸搖桑榆盡西靡
影落蘇子硯與屏天工與我兩厭事孰居無事為此形
與君持橐侍帷幄同列溫室觀堯葵自憐太史牛馬走
伎等卜祝均倡伶欲留衣冠掛神武便擊雲水歸南溟
陶泓不稱管城沐醉石可助平泉醒故持二物與夫子
欲使妙質留天庭但令滋液到枯槁勿遣光景生晦冥

上書掛名豈待我獨立自可當雷霆我時醉眠風林下
夜與漁火同青熒撫物懷人應獨嘆作詩寄子誰當聽

涵星硯

歐陽公硯譜龍尾溪石以金星者為貴

上書掛名

晁以道客語云范純父元

祐中與東坡數上書論事嘗約各草一疏東坡訪純父求所作疏先觀遂書名於末云軾不復自為矣純父再三求觀竟不肯出云無以易公者和月石屏詩云云蓋紀實也

附范純父原作

范太史集題云子瞻尚書惠涵星硯月石風林屏賦十二韻以謝

端溪千仞涵明星號山太古藏陰靈蘇公贈我此
二寶使我坐卧瞻雲屏我觀天地間有物皆流形

或從清空入幽谷中夜隕石翻階縈齊諧志怪不
能狀欲說但恐同優伶公遊浙江探禹穴長嘯宇
宙臨滄溟手攀天河弄星月醉落大筆還微醒故
分星月入我室光照窗戶風生庭長林偃絕壁晚
色寒青冥似聞洪濤卷萬木直幹不折當風霆玄
雲欲落雪夜久孤燈熒報贈愧無青玉案苦吟徒
使神鬼聽

次韻錢穆父會飲

彈冠恨不早掛冠常苦遲盛服每假寐角闕時伏思東
門未祖道西山空挂頤誓將江海去安此麋鹿姿要當
謀三徑何暇擇一枝與君幾合散得酒忘醇醪君談似
落屑我飲如奕碁公自注世有作詩如奕碁奕碁如飲
酒飲酒乃大戒之語僕於碁酒二事
俱不能也居官不任事造物真見私主人獨賢勞金穀方流
馳行人亦結束扶杜乃歸期公卿雖少安河流正東醜
我得會稽去方回良不癡

河流東醜

宋史河渠志元祐初河流雖北而孫村低下諸郡皆被災于是回河東流之議起安

燾深以東流為是蘇轍謂呂公著不如因舊而修其
未備會范百祿行視東西二河亦言東流高仰北流
順下決不可回時吳安持與李偉力主回河請置修
河司五年九月轍又言修河司不罷河朔生靈終不
得安居七年十月以大河東流賜吳安持三品服李
偉再任都水使者王宗望言東北兩流頻年紛爭不
決伏自奉詔凡九月上稟成算盡障北流使全河東
還故道望付史館紀錄○慎按時文潞公呂丞相力
主回河之議故云公卿
雖少安河流正東醜也

次韻穆父尚書侍祠郊丘瞻望天光退而相慶引
滿醉吟

千章杞梓蔭雲天
擣散誰收老鄭虔
喜氣到君浮白裏

豐年及我掛冠前
令嚴鐘鼓三更月
野宿貔貅萬竈烟
太息何人知帝力
歸來金帛看顏肩

侍祠

春明退朝錄每南郊大禮使宰相為大禮使學士為禮儀使鹵簿使御史中丞為儀仗使開封

府為橋道頓遞使真宗時東封西祀侍祠皆輔臣為五使南郊則用學士以下

郊丘

汴京遺跡志南

郊壇在開封城南薰門外其側又有南青城即宋祭天之齋宮北郊壇在府城北封丘門外其北又有北

青城即宋祭地之齋宮

附秦少游次韻

風馬雲車下九天
郊柴初告帝心虔
天如倚蓋臨

壇上星若聯珠繞御前縹緲珮環參雅奏岩堯樓
閣抱非烟侍臣舉酒欣相屬醉看參橫左右肩

郊祀慶成詩

帝出乘昌運天心予太平文章三代繼制作七年成大
祀乾坤合剛辰日月明泰壇朝掃地魄寶夜垂精仰御
圓蒼蓋環觀海岳城北流吞朔易西極落欒槍升燎靈
光答回鑒瑞霧迎需雲徧枯槁解雨達勾萌可頌非天
德因箴亦下情民言知有酌帝謂本無聲富國由崇儉

祈年在好生無心斯格物克己自銷兵化國安新政孤
臣返舊耕還將清廟什留與野人賡

郊祀

宋史哲宗本紀元祐七年十一月癸巳合祭天地於圓丘大赦天下曾鞏元豐類藁太祖已尊

四祖之廟郊祀以宣祖配天以翼祖配地太宗繼統禮官以王業自太祖始故興國之初再郊皆太祖配

天至淳化春以宣祖太祖同配如慶成漢書封禪文永徽故事皆禮儀使蘇易簡所定

社將以大祀張衡東京賦元祀惟稱羣望咸秩注元祀上祀也乾坤合宋史禮志

元豐六年冬至郊祀以太祖配不設皇地祇位哲宗初立未遑親祀有司攝事如元豐儀翰林學士顧臨

等謂祖宗皆合祭天地其不合祭者惟元豐六年一郊爾今失不定後必悔之范純禮等主北郊之議彭

汝礪曾肇復上奏論合祭之非而呂大防則言先帝
祀地之禮未經親行今上臨御之始正當親見天地
而獨不設地祇位恐亦不安太皇太后以為然遂合
祭天地東都事略元祐七年詔曰國家郊廟三歲一
親冬至合祭天地於圜丘元豐六年有司援周禮以
合祭不應古義詔定親祀北郊之儀未及行是歲南
郊不設皇祇位而宗廟之饗率如權制朕方郊見天
地之始其冬至日南郊宜依熙寧十年故事設皇地
祇剛辰禮記外事用剛需雲易雲上于天需君
位剛辰日內事用柔日需雲子以飲食宴樂解雨
易天地解而雷雨作雷雨
作而百果草木皆甲坼

附子由作

盛禮彌三祀初元正七年祭兼天地報儀自祖宗

傳講義金華久

自注近有旨講讀官訓釋祖宗齋祠故事十五條口陳于前

齋

心玉食鮮秋成通四海廩實到窮邊

自注今秋諸道皆奏豐稔

而陝西河東極邊尤甚

摩捲跳強寇

自注西羌入寇環州邊吏邀擊敗去

琛來

渡海船

自注高麗使前十日到闕預觀大禮

人和神亦答物備禮誠

全廟室開深靚郊丘對廣園翠帷新秘殿寶仗隘

通廛周冕裘繒儉

自注周禮大裘而冕以祀天有司欲為羔裘度用百羔上以其

害物以黑繒代之

唐車保介便

自注五輅有正觀欵志進退安重奕世所寶

導

前多舊德迎拜或華顛薦潔求陰燧馳誠寄燎煙

垂精粲星斗望秩徧山川降輅追前躅回班戒弗

虔徹罔深屈體屏蓋切承天

自注上至太廟門降輅步入齋殿至郊壇

止百官回班仍去黃道褥三事皆循祖宗故事而去繼特出上意

嶰谷灰初應

自注

緹室吹灰久廢不講近太史考求遺書復修其法

扶桑日欲躔旌旗逐風

轉歌舞送天旋簾啟瞻宸極雞號識漏泉矜愚開

罪罟釋欠靖民編樂作波翻海書行箭脫弦東朝

歸福祚南極本高僊有道知難犯無私每得賢幼

勞就聖德謙畏絕私權治道初無象神功竟莫宣

下臣叨進玉隨見頌誠然

自注臣于景靈郊丘實進玉幣

次韻王仲至喜雪御筵

三軍喜氣鑠飛花睡起空驚月在沙未集驂騑金腰褭
故殘鳩鵲玉橫斜偶還仗內身如寄尚憶江南酒可賒
宣勸不多心自醉強扶衰白拜君嘉

王仲至

宋史王欽臣字仲至用蔭入官文彥博薦試學士院賜進士及第性嗜古藏書數萬卷手

自警正世稱善本。按仲至時為工部侍郎本傳不載

還仗內

春明退朝錄唐制日御宣政殿

設殿中細仗于廷明皇欲避正殿遂御紫宸殿喚仗入閣門唐末常御殿更無仗遇朔望特設之熙寧二

年始御文德殿凡文武官百人執仗四百人皆立殿門之外宰相至陞朝官盡赴文德殿參假謂之橫行慎按能改齋漫錄云東坡元祐末為禮部尚書夢人送喜雪詩云是王仲至覺後惟記一聯仲至因足以成章曰曉雪誰驚最後時土膏方得助甘滋歲功已覺三元近春事何憂一覺遲不着寒梅容觸冒半留紅杏惜離披神交彼此無勞辨更為公題入夢詩三四乃夢中所得今附錄於此

次韻奉和錢穆父蔣穎叔王仲至四首

見和西湖月下聽琴

原作在
三十四卷

謾謾松下風藹藹隴上雲聊將竊比我不堪持寄君半生寓軒冕一笑當琴尊良辰飲文字晤語無由醺我有

風鳴枝背作蛇蚺紋月明委靜照心清得奇聞當呼玉

澗手

公自注家有雷琴甚奇古玉澗道人崔閑妙于雅聲當呼使彈

一洗羯鼓昏請歌

南風曲猶作虞書渾

見和仇池

原作在三十五卷

上窮非想亦非非下與風輪共一癡翠羽若知牛有角
空餅何必井之眉還朝暫接鷄鸞翼謝病行收麋鹿姿
記取和詩三益友他年弭節過仇池

癡輪

楞嚴經由因世界愚鈍輪迴癡顛倒故和合頑成八萬四千枯槁亂想如是故有無想羯南流

轉國土精神化為土
水金石其類充塞

玉津園

承平苑囿雜耕桑六聖勤民計慮長碧水東流還舊派

公自注玉津分蔡河上流復合於下

紫壇南峙表連岡不逢遲日鶯花亂

一作麗

空想疎林雪月光千畝何時耕帝藉斜陽寂歷鎖

雲莊

玉津園

文獻通考宋四園苑東曰宜春南曰玉津西曰瓊林北曰瑞勝汴京遺跡志玉津園在南

薰門外

雜耕桑

避暑燕語玉津園半以種麥每仲夏駕幸觀刈麥自仁宗後不復講矣惟契丹

賜射為故事

紫壇

漢書郊祀志甘泉秦時紫壇八觚注如

迎日之至升紫壇陳采席

千畝

國語王耕一畝庶人

天子耕田千畝率公卿親

帝藉

月令孟春天子乃以

耕所以先百姓而致孝敬

擇元辰天子親載耒耜措之于參保介之

御間帥三公九卿諸侯大夫躬耕帝藉

藉田

竊脂方紀瑞布穀未催耕魚沫依蘋渚蝸涎上綵楹江
湖來夢寐蓑笠負平生琴裏思歸曲因君一再行

藉田

皇宋事實類苑元豐二年詳定禮文所上言自
漢迄唐皆有帝藉神倉今久廢不設乞于京城

東南度地千畝置耜田仍徙先農壇于其中立神倉
於東南五穀之外並植菜蔬冬則藏冰一歲祠祭之
具焉用取

頃年楊康功使高麗還奏乞立海神廟於板橋僕
嫌其地湫隘移書使遷之文登因古廟而新之楊
竟不從不知定國何從見此書作詩稱道不已僕
不能記其云何也次韻答之

退之仙人也游戲于斯文談笑出奇偉鼓舞南海神頃
者三韓使幾為蛟鱷吞歸來築祠宇要使百賈奔

公自
注板

橋商賈所聚

我欲遷其廟下數浮空羣

公自注謂登州海市

移書竟不

從信非磊落人公胡為拳拳繫此空中雲作詩頌其美

何異刻劍痕我今已括囊象在六四坤

楊康功使高麗

徐兢高麗圖經元豐七年高麗王徽卒世子勲立百日又卒勲弟運立上

命左諫議大夫楊景畧為祭英使王舜封副之右諫議大夫錢總為弔慰使朱球副之七年七月自密之板橋航海而往孫升談圃呂端奉使高麗過洋取金書維摩經沉之間絲竹之聲起于舟下比經沈隱隱而去崔伯易在禮部求使高麗故實得申公事故楊康功錢總皆寫此經往時豐稷為楊掌筴表云東海洋龍宮之寶藏也氣如厚霧雖無風亦有巨浪舟前大龜如屋目如巨燭光耀沙上舟人以此卜之見則

無海神廟

齊乘東海淵聖廣德王廟在萊州西北二十里宋開寶六年重建參知政事賈黃中

作碑文又云登州北三里海濱與田橫寨相對本海神廟基宋治平中郡守朱處約以其地太高峻移廟

西置平地于此建蓬萊閣伏琛齊地記云始皇造橋欲渡海觀日出處海神為之驅石立柱

板橋

齊乘膠西縣古介葛盧國隋置縣唐省入高密以其地為板橋鎮文獻通考密州膠西縣本板橋鎮歐陽

忞輿地廣記板橋鎮即膠西地宋元祐三年復置縣

文登

太平寰宇記文登縣在登州東南二百八

十里石橋在縣南齊乘云文登縣本漢年平不掖縣地齊天統四年分年平置文登縣以地有文山始皇

召集文人登之故號曰文登

沐浴啟聖僧舍與趙德麟邂逅

南山北闕兩非真東潁西湖迹已陳季子來歸初可喜
老聃新沐定非人酒清不醉休休暖睡穩如禪息息勻
自笑塵勞餘一念明年同泛越溪春

啟聖僧舍

宋敏求東京記啟聖院本晉護聖營天福四年宣祖興禁兵太宗誕聖其地春明退

朝錄咸平初真宗令供奉僧元藹寫太宗御容于啟聖院汴京遺跡志啟聖院在大梁門內街北太平興國二年建雍熙二年成賜名

趙德麟

名令時注見前從潁州幕府官滿入京以東坡再薦擢光

丞祿

余舊在錢塘伯固開西湖今方請越戲謂伯固可

復來開鏡湖伯固有詩因次韻

已分江湖送此生會稽行復得岑成鏡湖席捲八百里
坐嘯因君又得名

伯固

蘇堅字伯固注見前

慎按此詩施氏原本不載今從新刻續補下

卷移編於此

僕所藏仇池石希代之寶也王晉卿以小詩借觀
意在於奪不敢不借然以此詩先之

海石來珠宮秀色如蛾綠坡陀尺寸間宛轉陵巒足連

娟二華頂空洞三茅腹初疑仇池化又恐瀛洲感殷勤

嶠南使餽餉揚州

一本作淮東

牧

公自注僕在揚州程德孺自嶺南解官還以此石見

遺

得之喜無寐與汝交不瀆盛以高麗盆藉以文登玉

公自注僕以高麗所餽大銅盆貯之又以登州海石如碎玉者附其足

幽光先五夜冷氣

壓三伏老人生如寄茅舍久未卜一夫幸可致千里常

相逐風流貴公子竄謫武當谷見山應已厭何事奪所

欲欲留嗟趙弱寧許負秦曲傳觀慎勿許聞道歸應

一作

更速

蛾綠

顏師古隋遺錄殿脚女爭效為長蛾者司宮吏日給螺子黛五斛號為蛾綠螺

武當谷

太平寰宇記劉宋時割武當縣隸始平郡隋初改均州太和山在州南一百二十里有七十二峯三十六巖二十四洞初名仙室山又名太嶽山玄武奉紫虛元君之命遊覽至此改名太和因棲止焉王晉卿竄逐事注詳二十九卷

附秦少游次韻

天鏡海濱石鬱若龜毛綠信為小仇池氣象宛然足連巖下空洞鼎脹彭亨腹雙峰照青連春眉鏡

中感疑經女媧煉或入金華牧熏爐充雲氣硯滴
當川瀆尤物足移人不必珠與玉道旁初無異漢
將疑虎伏支機亦何據但出君平卜奇礪入華林
傾都自追逐我願作陳那令吼震山谷一拳既在
夢二駒空所欲大士捨寶陀仙人遺句曲惟詩落
人間如置郵傳速

次天字韻答岑巖起

一聲清蹕霧開天百辟心莊豈貌虔回顧驚君珠玉側

同升愧我批糠前徘徊月色留壇影縹緲松香泛蠟烟

公自注近制以椽燭松明易燎盆

莫嘆郎潛生白髮聖朝求舊鄙鳶肩

岑巖起

名象求後入元祐黨籍

按公自注中燎盆施氏原注作粃盆考歲時雜記除夕作資燭以麻粃濃油如庭燎律有元日油粃之義月合通考除日送舊神焚松柴謂之粃盆

次韻蔣穎叔二首

扈從景靈宮

道人幽夢曉初還已覺笙簫下月壇風伯前驅清宿霧

祝融駢乘破朝寒英姿連壁從多士妙句鏘金和八鑾
已向詞臣得頗牧

公自注時韻叔
新除熙河帥

路人莫作老儒看

凝祥池

似知金馬客時夢碧雞坊水雪消殘臘烟波寫故鄉鳴
鸞自容與立馬久回翔乞與三韓使新圖到樂浪

公自注時

高麗使在都每至
勝境輒圖畫以歸

凝祥池

汴京遺跡志宋朝會要云大中祥符八年五
月詔會靈池以凝祥為名詩話總龜京師災

實盛于魯靈觀之凝祥池故歐陽文忠公
詩云凝祥池鎖會靈園僕射荒陂安可比

碧雞坊

按元

和郡縣志太平寰宇記皆不載梁益記云
成都之坊百有二十四坊曰碧雞坊
三韓後漢書東

夷傳韓有三種一曰馬韓二曰辰韓三曰弁韓高麗
圖經三韓之地大小共七十八國馬韓在西其北與
樂浪接辰韓在東
弁韓在辰韓之南
樂浪
史記元封三年朝鮮人來降
遂定其地立為真番臨屯玄
菟樂浪
四郡

附孔武仲作

平時念江國此地愜幽情楊柳繁無路鳬鷺遠有

聲郊原斜日下襟袂好風生把酒須
還家下

脫二字

隔城

慎按清江集和詩只有凝祥池
一首失去扈從景靈宮一首

和叔盎畫馬

天驥德力備馬外龍麟

別本作鱗訛

中皇天不遣言兀與圖

畫

一本作畫圖

同駕駘飽官粟未受一洗空十駕均一至何

事簡雲風

叔盎

鄧椿畫繼趙叔盎字伯充善畫馬米海岳畫史亦載其姓名

按山谷集有同子瞻和伯充團練七律一首任淵注云伯充宗室子即叔盎也今坡集中亦無七律

王晉卿示詩欲奪海石錢穆父王仲至蔣穎叔皆

次韻穆至二公以為不可許獨穎叔不然今日穎叔見訪親睹此石之妙遂悔前語僕以為晉卿豈可終閉不予者若能以韓幹二散馬易之者蓋可許也復次前韻

相如有家山縹緲在眉綠誰云千里遠

別本作還訛

寄此一

顰足平生錦繡腸
叅歲熬菟腹從教四壁空
未遣兩峯感吾今
况哀病義不忘樵牧
逝將仇池石歸泝岷山
瀆守子不貪寶
完我無瑕玉
故人詩相戒
妙語予所伏
一

篇獨異論三占從兩卜君家畫可數天驥紛相逐風駿
掠原野電尾捎澗谷君如許相易是亦我所欲今朝安
西守來聽陽關曲勸我留此峯他日來不速

安西守

全邊紀畧臨洮郡宋為鎮洮軍熙寧中改熙
州唐安西都護地時穎叔出守熙河故稱之

軾欲以石易畫晉卿難之穆父欲兼取二物穎叔
欲焚畫碎石乃復次前韻并解二詩之意

春冰無真堅霜葉失故綠鷄疑鵬萬里蛟笑夔一足二
豪爭攘袂先生一捧腹明鏡既無臺淨瓶何用甃盆山

不可隱畫馬無由牧聊將置庭宇何必棄溝瀆焚寶真
愛寶碎玉未忘玉久知公子賢出語耆年伏欲觀轉物
妙故以求馬卜維摩既復捨天女還相逐授之無盡燈
照此久幽谷定心無一物法樂勝五欲三峨吾鄉里萬
馬君部曲卧雲行歸休破賊見神速

公自注晉卿將種常有此意

三峨

名山記峨眉山周匝千里游大峨者自峨眉縣勝峯門出至華嚴院十五里厯八十四盤凡六

十里至峯頂即普賢示現處太平寰宇記中峨山在縣南二十里又名覆蓬山又十里小峨山一名鐸丹

山鮮于繪議道堂記漢嘉背負三峨襟帶二江

生日蒙

一無蒙字

劉景文以古畫松鶴為壽且貺佳篇

次韻為謝

問子一室間寧有千里廓塵心洗長松遠意發孤鶴生

朝得此壽死籍疑可落微言在參同妙契藏九籥

一作龠

故人有奇趣逸想寄幽壑霜枝謝寒暑雲翮無前却何

須構明堂未羨巢阿閣緬懷別時語復作數日惡詩腴

固堪飡字瘦還可愕高標忽在眼清夢了如昨君今噲

等伍志與湛輩各豈待相顧

一作願

言方為不朽託子雲老

執戟長孺終主爵吾當追松喬子亦鄙衛霍

昨夢

圓覺經如昨夢故當知生死涅槃無起無滅無去來今

程德孺惠海中拍石兼辱佳篇輒復和謝

嵐薰瘴染却敷腴笑飲食泉獨繼吳未欲連車收蕙苴
肯教沈網取珊瑚不知庾嶺三年別收得曹溪一滴無
但指庭前雙栢石要予臨老識方壺

程德孺

名之元注見前

庾嶺

吳錄南瑩縣有大庾山其路險峻螺轉而上踰九磴南康記大

庾嶺漢名臺嶺嶺有石平如臺形如廩庾又曰漢有庾勝者梅鋗之將隸番君使分兵守臺嶺築城嶺下

因名庾嶺張无垢橫浦集云初嶺東廢路人苦峻極開元四載張九齡相其山谷之宜草其坂險之故宋嘉祐間蔡挺提刑江西其弟抗漕廣東乃商度工用陶土甃境北路廣八尺長一百九丈南路廣一丈二尺長三百十五丈復夾道種松以休行旅遂成車馬之途

次秦少游韻贈姚安世

帝城如海欲尋難肯捨漁舟到杏壇剝啄扣君容膝戶
巍峩笑我切雲冠問羊獨怪初平在牧豕應同德曜看
肯把參同較同異小窗相對為研丹

姚安世

疑即姚丹元
詳見後篇注

按淮海集中
失去原作

次丹元姚先生韻二首

浮生知幾何，僅熟一釜羹。那於俯仰間，用此委曲情。自
憐無他腸，偶亦得此生。懸知當去客，中有不亡存。但恐
宿緣重，每為習氣昏。似聞梅子真，近在一作至吳市門。未

能肩拍

一作拊訛

洪但欲目擊溫，不敢叩門呼。恐作踰垣奔。

且以介紹先，徐以方便論。

不學劉更生，黃金鑄上方。不學房次律，身事問潁陽王。

烈亦何人叔夜未可量獨見神山開遽食石髓香至道
尚聽瑩粗才終蹶張先生喜而笑幅巾登我堂誓誓指
黃壤要言刻青琅蓬萊在何許弱水空相望且當從稽
阮聊復數山王達人友四海曲士守一疆慎一作謹勿使
形謀兒童驚夜光

姚丹元

長公外紀子瞻喜神仙晚因王鞏得姚丹元者尤奇之直以為太白所化待之甚嚴姚本

京師富人王氏子不肖為其父所逐去事建隆觀一道士天資敏慧因取道藏徧讀或能成誦又多得丹術方藥大抵有口好大言作詩間有放蕩奇譎語故能成其說浮沈淮南屢易姓名子瞻初不能辨也後

復其姓名曰王繹崇寧中用技術進為醫官出入蔡魯公門下醫多奇中余猶及見其與魯公言從子瞻事且云海上海上神仙宮闕皆能以術致之可使空中立見魯公亦微信之坐事編管楚州梁師成薦其有術宣和末復為道士名元誠力詆林靈素為林所毒嘔血死與施氏原注詳畧不同今備錄之

石髓

仙經云神仙五百歲輒開其洞中有石髓取而食之壽可齊天地

慎按藥城集載次韻姚道人二首前首止論

字韻後首起方字韻先生詩亦應分二首諸

刻本俱訛今改正

附子由次韻二首

西山學采薇東坡學者羹昔在建城市豈復衣冠
情朋友日已疎止接盲趙生嗇智徇所安元氣賴
以存時于星寂中稍護亂與昏河流發九地欲挽
升天門枉用十年力僅餘一燈溫老病竟未除驚
呼欲狂奔何日新雨餘得就李主論

高人隱陋巷至藥初無方心知無生妙運轉開陰
陽才如凌雲松豈受尺寸量氣如幽谷蘭時送清
風香嗟我本病肺寒暑隨翕張丹砂苦落落青春

去堂堂清詩墮雲霧至音扣琳琅山海洵多士世
俗非所望遠遊居臨安間出從諸王他年解冠珮
共遊無邊疆儀麟既委照永謝過隙光

次韻秦少游王仲至元日立春三首

以下癸酉作

省事天公厭兩回新年春日併相催殷勤更下山陰雪
要與梅花作伴來

己卯嘉辰壽阿同

公自注子由一字同叔元日己卯渠本命也

願渠無過亦

無功明年春日江湖上回首觚稜一夢中

詞鋒雖

一作唯

作楚騷寒德意還同漢詔寬好遣秦郎供

帖子盡驅春色入毫端

公自注立春日翰林學士供詩帖子

漢詔

施氏原注引續漢禮儀志云立春之日翰林學士供詩帖子

附秦少游原作

此度春非草草回美人休着剪刀催直須殘臘十

分盡始共新年一併來

發春獻歲偶然同新歷觀天最有功頭上兩般幘

勝影一時看入酒杯中

攝提東直斗杓寒驟覺中原氣象寬天為兩間同
號令不教春歲各開端

上元侍飲樓上三首呈同列

澹月疎星遶建章僊風吹下御爐香侍臣鵠立通明殿

一作觀
一朵紅雲捧玉皇

上元樓

宋史禮志唐以後正月望夜開坊市門然燈宋因之上元前後各一日大內正門結綵為

山樓天子先幸寺觀行香遂御樓或御東華門及東西角樓從臣與宴四夷蕃客各依本國朝舞列樓下亦賜酒食勞之乾德五年詔更放十七十八兩夜遂為例春明退朝錄本朝太宗時三元不禁夜上元御

乾元門中元下元御東華門後罷中元下元二節而
初元遊觀之盛冠于前代夢梁錄正月十五汴京大
內前縛山棚對宣德樓悉以綵結文殊普賢跨獅子
白象用轆轤絞水上燈棚高處放下如瀑布又縛成
雙龍中置燈燭萬盞望之蜿蜒似飛走
鵠立集異記
之狀上御宣德樓觀燈令萬姓同樂
山玄卿

新宮銘仙翁鵠
立道師冰潔

薄雪初消野未耕賣薪買酒看升平
吾君勤儉倡優拙
自是豐年有笑聲

老病行穿萬馬羣九衢人散月紛紛
歸來一盞殘燈在
猶有傳柑遺細君
公自注侍飲樓上則貴戚爭以黃柑
遺近臣謂之傳柑聽攜以歸蓋故事

也

附子由次韻

樂城集題云次韻子瞻
上元扈從觀燈二首

虜去邊城少奏章雪殘中禁罷焚香都人知有新

年喜爭看珣與金鳳凰

春來有意乞歸耕足痺三年久未平

自注頃奉使
契丹墜馬傷

足已三年矣

忽記上元鑾輅出起聽前殿曉鐘聲

按樂城集中失
去次韻第三首

附秦少游次韻

赭黃繖底望龍章不斷惟聞寶炬香一片韶音歸
複道重瞳左右列英皇

端門魏闕鬱崢嶸燈火如山輦路平不待上林鶯
百轉教坊先已進春聲

仗下蕃夷各一羣機泉如雨自繽紛諦觀香案旁
邊吏却是茅家大小君

按黃山谷集亦載此三詩細繹
語氣與黃不似故斷為秦作

戲答王都尉傳柑

侍史傳柑玉座旁人間草木盡天漿寄與維摩三十顆

不知蒼蠅是餘香

公自注舉輕明重
維摩猶三十顆

慎按此詩施氏原本不載今從新刻續補下

卷附編於此

送蔣穎叔帥熙河

并引

穎叔出使臨洮與穆父仲至同餞之各賦詩一篇以
今我來思為韻致遠歸之意得我字

西方猶宿師論將不及我苟無深入計緩帶我亦可承

明正須君文字榮藻火自薦雖云數留行終不果正坐

喜論兵臨老付邊鎖

一作瑣

新詩出談笑僚友困掀簸我

欲歌秋杜楊柳方婀娜邊風事首虜所得蓋么麼願為

魯連書一射聊城筭陰功在不殺結草酬魏顆

蔣之奇

施氏原注蔣穎叔名之奇時由戶部侍郎知熙州以多行益務修守備謹斥堠常若寇

至終穎叔去不敢犯紹聖間章子厚秉政召為中書舍人知開封除翰林學士出守汝慶徽宗擢為知樞

密院除觀文殿學士知杭州以與議棄河湟奪官職既卒以嘗陳紹述之言盡復之此段新刻刪去今補

錄

熙河

九域志秦鳳路熙州臨洮郡鎮洮軍節度唐寶應元年陷于西蕃熙寧五年收復治狄道

縣西界至河州一百里河州安鄉郡軍事唐河州後
廢熙寧六年收復仍置南至洮州一百九十五里東
至長安一付邊鎖猶云寄北門鎖鑰也施氏原注引
千五百里漢書丙吉傳虜入雲中代郡吉召
東曹案邊長吏瑣科
條具人者訛今駁正

再送二首

使君九萬擊鵬鯤肯為陽關一斷魂不用寬心九千里

安西都護國西門

九千里

白居易西涼伎歌平時安西萬里疆今日邊防在鳳翔自注云平時開遠門外立堠云去

安西九千九百里以示戍人不
安西都護
杜佑通典永徽中於

邊方置安東安西安南安北四大都護唐會要貞觀十四年侯君集平高昌于西州置安西都護府治交河城二十二年突厥內附置于庭州太平寰宇記唐龍朔元年西域諸國求內屬乃分置十六都督統府州八十縣一百十軍府一百二十六隸安西大都護仍于吐火羅立碑紀之

餘刃西屠橫海鯤應余詩識是游魂

公自注顏叔未有洮帥之命作扈駕

詩僕和之有游魂之句遂成詩識

歸來趁別陶弘景看掛衣冠神武門

次韻顏叔觀燈

安西老守是禪僧到處應然無盡燈永夜出游從萬騎諸羌入看擁千層便因行樂令投甲不用防秋更打水

振旅歸來還侍宴十分宣勸恐難勝

次韻王晉卿奉詔押高麗宴射

北苑傳呼陞楯郎東夷初識令君香天山自可三箭取
海國何勞一葦杭宣勸不辭金盃側醉歸爭看玉鞭長
錦囊詩草勤收拾莫遣雞林得夜光

押高麗宴

東京夢華錄高麗使人在大梁門外安州巷同文館元旦朝見訖後二日詣南御苑

試射朝廷旋選能射武臣伴射射畢賜宴

慎按南御苑即玉津園也葉石林燕語云玉津園為契丹賜射之地考汴京遺跡志園在南薰門外今先

生起句云北苑傳呼陸楸郎范
純父集亦云在北苑未詳孰是

附純父次韻

天上星弧日射狼
副車衣袂得餘香
朝雲曾落雙
雕羽遼海將歸萬里航
酒醺堯尊賓已醉
春回漢苑漏初長
何郎拜舞恩波渥
花簇金鞍道路光

次韻錢穆父王仲至同賞田曹梅花

寒廳不知春
獨立耿玉雪
閉門愁永夜
置酒及明發
忽驚庭戶曉
未受煙雨沒
浮光風宛轉
照影水方折
鬢霜

未易掃眉斧真

一作親

自伐惟當此花前醉卧黃昏月

田曹

宋史工部所屬有屯田掌天下屯田及文武職田公廨田

寒廳

韓愈詩勤來得晤語勿憚

宿寒廳

送襄陽從事李友諒歸錢塘

居杭積五歲自意本杭人故山歸無家欲卜西湖鄰
良田不難買靜士誰當親髯張既超然老潛亦絕倫
李子冰玉姿文行兩清淳歸從三人游便足了此身
公隄不改作姥嶺行開新幽夢隨子去松花落衣巾

從事李友諒

職官分紀諸州掾屬統謂之從事趙德麟侯鯖錄云在襄陽日同官李友諒中

益贈張子齊家歌人團茶余作詩云云仲益施注作叔益未詳孰是 髯張 名璿字秉道吳興六客之

一本集相視新堤和秉道詩云髯張乃我結襪生即其人也施注新刻本引王注云髯張不知為誰蓋失

于細 公隄 咸淳臨安志元祐中東坡既開濬湖水因考耳公隄以所積葑草築為長隄綿亘數里夾道雜

植花柳行者便之嗣守林希榜 姥嶺 咸淳臨安志龍曰蘇公隄邦人祠公于隄上 山有姥嶺長公

外紀云公在杭州請開石門河已得請而林子申為代諛者言今鑿龍山姥嶺正犯太守身故寢其議今

詩中云云慎按公意謂若得再至杭當復開此嶺也施注以為天姥山者訛又按臨安志仁和肇元鄉別

有石姥嶺亦非此姥嶺也

次韻吳傳正枯木歌

天公水墨自奇絕，瘦竹枯松寫殘月。夢回踈影在東窗，
驚怪霜枝連夜發。生成變壞一彈指，乃知造物初無物。
古來畫師非俗士，妙想實與詩同出。龍眠居士本詩人，
能使龍池飛霹靂。君雖不作丹青手，詩眼亦自工識拔。
龍眠胸中有千駟，不獨畫肉兼畫骨。但當與作少陵詩，
或自與君拈秃筆。東南山水相招呼，萬象入我摩尼珠。
盡將書畫散朋友，獨與長鋏歸來乎。

吳傳正

名安詩詳見施氏原注

摩尼珠

翻譯名義集摩尼或云踰摩或云末尼珠之總

名也此名離垢大品云如摩尼寶珠若在水中隨作一色天台云摩尼者如意也草堂禪師箋要云心體靈知不昧如一摩尼珠圓照空淨都無差別以體明故對物時能現一切色相

送黃師是赴兩浙憲

世久無此士我晚得王孫寧非叔度家豈出次公門白
首沈下吏綠衣有公言哀哉吳越人久為江湖吞官自
倒帑廩飽不及黎元近聞海上港漸出水底村願君五
袴手招此半菽魂一見刺史天稍忘獄吏尊會稽入吾

手鏡湖小於盆比我東來時無復一作憂瘡痕存

黃師是

名實注詳二十四卷泗州除夜送酥酒詩下

綠衣公言

東坡老人詩話黃師

是赴浙憲東坡與之姻家置酒餞其行使朝雲侍飲坐間賦詩有綠衣有公言之句後人乃謂綠衣小官猶惜其不留也時朝雲語師是曰他人皆進用而君補外何也是謂公言而綠衣則指朝雲也

附張文潛次韻

昔見君納婦今見君抱孫先公自種德子合大其門何為亦如我有抱不得言崢嶸胸中氣默默自吐吞誰如東坡老感激論元元欲將洛陽裘盡蓋

江湖村既引海若頸又鞭江胥魂

以下脫二句

意令仰

天民不隔頂上盆我獨乞禪床一氣中夜存

按文潛此詩內史集中失載今從宛丘集采出附錄于此

送范中濟經略侍郎分韻賦詩得先字且贈以魚枕杯四馬箠一以元戎十乘以先啟行為韻

梁李久樂禍自焚豈非天兩鼠鬪穴中一勝亦偶然謀初要百慮善後乃萬全廟堂選世將范氏真多賢仁風被宿麥綠浪搖晴川號令聳毛羽先聲落虛弦我家天

一方去路城西偏投竿困障日賣劍行歸田贈君荆魚
杯副以蜀馬鞭一醉可以起毋令祖生先

范中濟

施氏原注中濟字子奇五世祖仁恕相蜀因
葬成都祖雍字伯純始家河南中濟以蔭歷

官

字以下

茂缺行

建言

山璽

恃險

為邊

患宜

郡縣

之其

後

章子厚

開五

溪議

由此

起歸

判將

作監

使契

丹虜

欲

撓之不

屈歷

四路

漕左

司司

農卿

由河

陽守

召權

戶

部侍郎

元祐

八年

二月

為集

賢殿

修撰

知慶

州中

濟

在慶進

寶文

閣待

制廣

儲蓄

城柵

嚴守

備羈

黠羌

推

誠待下

人樂

為用

入為

吏部

侍郎

以

待制

致仕

子坦

字伯履

事徽

宗知

開封

府再

使遼

時邊

議萌

芽故

非

時遣使

以觀

釁坦

言不

宜始

禍力

辭行

帝怒

責團

練

副使後

為戶

部侍

郎此

段新

刻本

大經

畧宋

史經

畧

半刪改

今錄

存其

舊缺

者仍

存疑

經畧

宋史

經畧

安撫

一路兵民之事于機速邊防及士卒抵罪聽以便裁
斷帥臣任河東陝西嶺南路職在撫綏戎夷則為經
畧安撫使兼都總管以統制梁李宋史趙秉常立時
軍旅所以重帥權服羌夷也梁李年七歲國母梁氏
稱太后攝政元豐四年有李清者本秦人說秉常以
河南地歸宋國母知之遂誅清而奪秉常政鄜延總
管种諤乃疏夏國有亂宜興問罪之師詔李憲等大
舉征夏破之于無定川循水北行地皆沙濕軍無所
得遂班師此詩起四世將施氏原注伯純在仁宗朝
句正指元豐中事世將為副樞李元昊叛拜鎮武
節度使知延州又知永興軍故投竿障日杜牧詩惆
云廟堂選世將范氏真多賢
竿手却遮西荆魚杯註見第二卷
日向長安

附孔武仲詩

清江集題送范中
濟知慶州得以字

平時廣朝中相見輒歡喜昂藏八尺身所負必奇
偉四方欲善敗軍事盈虛計叩之如川流滾滾不
知已天子曰汝能吾臣鮮其比而況所設施粲粲
在邊鄙西戎未純一汝可三軍帥擒之或縱之高
枕惟爾恃公拜稽首歸睂目凜生氣頑童玩天恩
豢養若驕子欲痛以鞭箠而畏啼不止二者不兩
全節制視所以又如畜狂犬繫頸不繫尾收其要
害處進退隨所指重城撤闕鎖沙漠淨如水辭別

不躊躇安邊從此始

書晁說之考牧圖後

我昔在田間但知羊與牛川平牛背穩如駕百斛舟
行無人岸自移我卧讀書牛不知前有百尾羊聽我鞭
聲如鼓擊我鞭不妄發視其後者而鞭之澤中草木長
草長病牛羊尋山跨坑谷騰趨筋骨強烟蓑雨笠長林
下老去而今空見畫世間馬耳射東風悔不長作多
牛翁

晁說之

宋史晁說之字以道少慕司馬溫公之為人自號景迂年未三十蘇軾以著述科薦之靖

康初召為著作郎兼東宮詹事以待制侍讀終晁氏世譜以道一字伯以元豐五年進士所著有嵩山集

考牧

詩小序無羊宣王考牧之什也

慎按宋史本傳及晁氏世譜皆不言以道工繪事見於同時諸公題咏東坡而外山谷有題說之雪雁詩无咎亦有題以道四弟橫軸畫詩

呂與叔學士挽詞

言中謀猷行中經關西人物數清英欲過叔度留終日
未識魯山空此生議論凋零三益友功名分付二難兄

老來尚有憂時嘆此涕無從何處傾

呂與叔

東都事畧呂大臨通六經尤深于禮元祐中為太學博士遷秘書正字卒君子惜之

二

難兄

大忠字進伯大防字微仲東都事畧皆有傳

此涕無從

禮記孔子之衛遇舊館人

之喪入而哭之哀出使子貢說驂而賻之子貢曰於門人之喪未有所說驂說驂於舊館毋乃已重乎夫子曰予鄉者入而哭之遇于一哀而出涕予惡夫涕之無從也小子行之施氏原注引此段顛倒原文殊為謬誤

今改正

丹元子示詩飄飄然有謫仙風氣吳傳正繼作復

次其韻

飛仙亦偶然脫命瞬息中惟詩不可擬如寫天日容夢
中哦七言玉丹已入懷一語遭綽虐入身墜蓬萊蓬萊
至今空護短不養才上界足官府謫仙應退休可憐吳
與蘇翫醴雪滿頭雪滿頭一本無疊用三字終當却與丹元子
笑指東海乘桴浮

丹元子

即前詩題所云丹元姚先生也王氏注訛認丹元子為書名今駁正

上界官府

五源訣云番陽仙人王遙琴子高言下界功滿方超上界上界多官府不如地仙快活見顧况高祖受命

造唐賦
注中

次韻王定國書丹元子寧極齋

仙人與吾輩寓迹同一塵何曾五漿饋但有爭席人寧
極無常居此齋自隨身人那識郗鑒天不留封倫誤落
世網中俗物愁我神先生忽扣戶夜呼祁孔賓便欲隨
子去著書未絕麟願掛神虎一作武冠往卜飲馬鄰王郎
濯紈綺意與陋巷親南游苦不蚤倘及萼鱸新

飲馬隣

未詳王氏注云蘇州有飲馬橋丹元子蓋蘇州人也此種注脚穿鑿附會吾所不取

王仲至侍郎見惠穉枯種之禮曹北垣下今百餘

日矣蔚然有生意喜而作詩

翠枯東南美近生神嶽陰惜哉不可致霜根絡雲岑仙
風振高標香實隕平林偶隨樗櫟生不為樵牧侵忽驚
黃茅嶺稍出青玉鉞好事雖力取王城少知音豈無換
鵝手但知覓來禽高懷獨夫子一見捐橐金得之喜不
寐贈我意殊深公堂開後閣凡木愧華簪栽培一寸根
寄子百年心常恐一作思樊籠中摧我鸞鶴襟一作衿誰知
積雨後寒芒曉森森恨我迫歸老不見汝十尋蒼皮護

玉骨旦莫視古今何人風雨夜卧聽饑龍吟

枯

本草柏葉松身曰枯即檜也與柏同

東南美

爾雅東南之美者會稽之竹箭

覓來禽

施氏原註引尚書故實云王內史帖中有與蜀郡守書求來禽帖新刻刪去補錄

附范純父次韻

蘇公滄洲趣日夕懷山陰公堂種珍木寄夢天姥

岑亭亭碧玉幹氣象俯喬林雷霆已難拔霜雪何

敢侵蒼皮卷鱗甲細葉抽鋒鍼稍出珊瑚枝中含

笙磬音鸞凰待棲息詎肯容凡禽西風蕩積雨畏

日方流金潭潭宗伯府窈窕巖谷深北窗卧羲皇
笑語盍朋簪蒼生望安石出處本無心萬象入毫
端四溟納胸襟文房俎豆列武庫矛戟森甘棠愛
召伯勿使螻螳尋世俗名貴遠豈知古猶今他年
老東山應記梁父吟

次韻錢穆父馬上寄蔣穎叔二首

玉關不用一丸泥自有長城烏鼠西剩與故人尋土物
臘糟紅麴寄馳蹄

紅麴

本草造麴法出近世亦奇術也入酒及鮮醢中鮮紅可愛

駝蹄

杜甫詩勸客駝蹄羹

多買黃封作洗泥使君來自隴山西高才

一本作才高

得免

人人羨爭欲尋蹤覓舊蹄

隴山

說文隴山天水大坂也泉流四注登者七日乃越有大小二隴鳳翔志隴山在隴川西北六十里

附錢穆父原作二首

春雪京城一尺泥並鞍還憶蔣征西
碧幢紅旆出

關去一路東風送馬蹄

不論埃壒與塗泥封印還家日正西
豈比元戎碧

油下猊貅繞帳馬千蹄

按穆父集世不傳右二首
附見淮海集注中今採出

附秦少游次韻

新淬魚腸玉似泥將軍唾手取河西偏裨萬戶封

龍額部曲千金賜褭蹄

制詔行間降紫泥簪花且醉玉東西羌人誰謂多
籌策止有黔驢技一蹄

表弟程德孺生日

仗下千官散紫庭微聞偶語說蘇程長身自昔傳甥舅

壽骨遙知是弟兄

公自注予與君皆壽骨貫耳班列中多指予二人不問而知其為中表也曾

活萬人寧望報

公自注君在楚州予在杭州皆遇饑歲活數萬人

祇求五畝却

歸耕四朝遺老凋零盡鶴髮他年幾箇迎

七年九月自廣陵召還復館於浴室東堂八年六

月乞會稽將去汶公乞詩乃復用前韻三首

乞郡三章字半斜廟堂傳笑眼昏花上人問我遲留意

待賜頭綱八餅茶

公自注尚書學士得賜頭綱龍茶一斤八餅今年綱到最遲

浴室

在興國寺中注詳三十三卷自杭州召還詩下

水汶公

名慧汶號法真注見前

乞郡三章

本集自兵部召還外郡劄子辭兩職

并乞郡劄子又有乞越州劄子凡三章

頭綱

熊蕃北苑茶錄每歲分十餘綱惟白茶自驚蟄前興

役浹日乃成飛騎疾馳不出仲春已至京師號為頭綱

八餅

茗溪漁隱叢話北苑細色茶五綱凡

四十三品共七千餘餅其間貢新試龍團勝雪白茶御苑玉芽此五品乃水揀為第一餘乃生揀次之又

有粗色茶七綱凡五品大小龍團餅并揀芽悉入龍腦和膏為團餅共四萬餘餅東坡題汶公詩卷待賜

頭綱八餅茶即今粗色紅綾袋餅八者是也

夢繞吳山却月廊白梅盧橘覺猶香

公自注杭州梵天寺有月廊數百間

寺中多白楊梅盧橘會稽且作須臾意從此歸田策最良

東南

一本作南來

此去幾時歸倦鳥孤飛

一作雲

豈有期斷送

一生消底物三年光景六篇詩

吳子野將出家贈以扇山枕屏

峩峩扇中山絕壁信天剖誰知

一作施

大圓鏡衡霍入戶

曠得之老月師畫者一醉叟常疑若人胸自有雲夢數

千巖在掌握用舍彈指久低昂不自知恨寄兒女手短

屏雖曲折高枕謝奔走出家非今日法水洗無垢浮游

雲釋嶠宴坐柳生肘忘懷紫翠間相

以下脫三字首

吳子野

名復古又號麻田山人南海人所居名遠游菴先生南遷時為作遠游菴銘見本集

慎按諸刻本皆以宴坐柳生肘為結句惟施氏原本有忘懷紫翠間二語末句止存相首二字中間與到白三字好事者所補也今仍闕疑以俟考

聞潮陽吳子野出家

予昔少年日氣蓋里閭俠自言似劇孟叩門知緩急千

真敞屣脫棄何足惜四大猶幻座衣冠矧外物一朝發
無上願老靈山宅世事子如何禪心久空寂世間出世
間此道無兩得故應入枯槁習氣要除拂丈夫生豈易
趣舍志匪石當為獅子吼佛法無南北

潮陽

九域志廣南東路潮州潮陽郡軍
事治海陽縣南至海一百七十里

南北

慎按傳
燈錄達

摩西來為禪宗初祖遞傳至弘忍為五祖自此而下
分南北二宗以慧能為六祖北宗以神秀為六祖獨
孤及三祖碑云能公退老于曹溪其嗣無聞秀公傳
普寂所謂大照禪師也門徒萬人升堂者六十三其

弟子遂尊普寂為七祖蓋其初頓門衰而漸門盛至
唐開元末荷澤會公出而南宗大振貞元十二年定
禪門宗旨勅立荷澤為
七祖宗門之統系乃定

慎按此詩施氏原本不載今從新刻續補上
卷因人附編於此

附參寥子作

原題云贈吳
子野先生

麻田老仙心炯炯少有高風慕箕穎枕流漱石三
十年眸子瞭焉神更靜忽然枝策海上來至人道
妙同塵埃達官貴侯競招致往無所欲誰嫌猜邇

來一志從吾黨跡與孤雲共天壤曹溪有路更攀

躋徑躡毘盧高頂上

自注子野出家
事見東坡詩中

贈王覲


何人生得寧馨子今夜初逢掣筆郎莫怪圍碁忘瓜葛
已能作賦繼靈光

慎按本集有元祐癸酉八月二十七日於建

隆章淨館書贈王覲七言絕句一首海上東

風犯雪來云云考會昌一品集乃李文饒懷

京國詩也蓋先生偶書李詩以贈觀後人遂
訛編集中今已移置他集互見卷矣此詩必
是時所作故從新刻改編於此



蘇詩補註卷三十六

欽定四庫全書

集部

蘇詩補註卷三十七

詳校官庶吉士_臣李傳熊

檢討_臣何思鈞覆勘

總校官原任中允_臣王燕緒

校對官中書_臣王家賓

謄錄監生_臣胡念祖

欽定四庫全書

蘇詩補註卷三十七

翰林院編修查慎行撰

古今體詩五十二首

起元祐八年癸酉九月出知定州明年甲戌紹聖改元四月謫

惠州南街

過金陵作

東府雨中別子由

庭下梧桐樹三年三見汝
前年適汝陰見汝鳴秋雨去
年秋雨時我自廣陵歸
今年中山去白首歸無期
客去莫歎息主人亦是客
對牀定悠悠夜雨空蕭瑟
起折梧

桐枝贈汝千里行歸

一作重

來知健否莫忘此時情

東府

魏鶴山集宋初置三省與樞密院各分班奏事謂之二府神宗時立東西二府陳繹東府記略

云國朝以來尚襲唐故大臣多不建第而僦居民間熙寧三年秋新創二府度地于闕之西南明年八月東府四位告成詔知制誥臣繹為之記石林詩話元豐初建東西府于右掖門之前每府相對為四位俗謂之八位張侍郎文裕以詩慶宰執元厚之和曰黃閣勢連東鳳闕紫樞光直右銀臺蓋東府與東闕相近西府正中山元與六郡縣志定州戰國時為中山國直右掖門鉅鹿置常山中山二郡城中有小山故曰中山慕容垂建都于此魏道武改定州太平寰宇記河北道定州博陵郡宋為定武軍節度與地廣記政和中復改定州為中山府

謝運使仲適座上送王敏仲北使

衝風振河朔飛霧失太行相逢不相識下馬須看黃洗
眼忽驚笑見此玉節郎喜有賢主人共惜

一作此

殘燭光

聚散一夢中人北雁南翔吾生如寄耳送老天一方幸
子遇明主陳經入西廂歸期不可緩倚相宜在旁

謝仲適

爵里失考

王敏仲

施氏原注敏仲名古文正公旦曾孫第進士熙寧中為司農主

簿行淮浙究張若濟獄劾轉運使王廷光張靚失職皆坐斥歷使諸路入為郎進太常少卿奉使以下字先生謫惠州敏仲適帥廣恩情裕厚餽問無虛月往還書帖載集中此段原本所有新刻刪去今補錄以

存舊○慎按宋史王古懿敏公素從子靖之子第進士歷遷戶部侍郎詳定役法與蔡京多不合詔徙古兵部歷戶部尚書攻者不已以領寶文閣直學士知成都坐黨籍責衡州別駕獨不載北使事河朔太平寨宇記河東道朔州馬邑郡理鄯陽縣秦為雁門郡唐武德四年置朔州縣二十境東西二百八十里南北九

玉節

周禮守邦國者用玉節

書丹元子所示李太白真二首

天人幾何同一漚謫仙非謫乃其遊麾斥八極隘九州
化為兩鳥鳴相酬一鳴一止三千秋開元有道為少留
縻之不可矧肯求

兩鳥

李白大鵬賦序云昔于江陵見天台司馬子微謂余有仙風道骨可與神遊八極之表因著大

鵬遇希有鳥賦以自廣其末云此二禽已登于寥廓而斥鷃之輩空見笑于樊籬

西望太白橫我岷眼高四海空無人大兒汾陽中令君

小兒天台坐忘身

一本作賀季真一本作坐忘真

平生不識高將軍手

汚吾足乃敢瞋作詩一笑君應聞

坐忘

司馬子微所著坐忘論云惟滅動心不滅照心不依一物而心常住有事無事嘗若無心此謂

正定定不求慧而慧自生此謂真慧慧而不用心與道冥久而行之自然得道

慎按孫紹遠聲畫集載東坡此詩自西望太白空峨岷以下另是一首向來刻本合而為一者訛僧洪覺

乾所著禁齋謂先生此詩一韻七句方換韻亦認以為一首也今據聲畫集改正

次韻曾仲錫承議食蜜漬生荔枝

代北寒釐擣韭萍奇苞零落似晨星逢鹽久已成枯腊

得蜜猶疑

一作應

是薄刑欲就左慈求拄杖便隨李白跨

滄溟攀條與立新名字兒女稱呼恐不經

公自注俗有十八娘荔枝

曾仲錫

施氏原注仲錫時為定武倅費袞梁溪漫志左右正言太學國子博士皆為承議郎文散

官第七品兒女稱呼

蔡君謨荔枝譜十八娘色深紅而細長時人以少女比之俚傳閩王氏有

女第十八好歌此品因名其冢在城東報國禪院冢旁猶種此樹云

大行太皇太后高氏挽辭二首

至矣吾三后功高漢已還復推元祐冠蓋得永昭全

自公

注嘗于經筵論奏仁宗皇帝謚曰明孝若明而不仁則民畏而不愛仁而不明則民愛而不畏今大行太皇太后亦兼此二德故天下思慕庶幾于仁宗也有作猶非聖無私乃是天侍臣

談道要家法信家傳

公自注宰相以下嘗于經筵論奏祖宗以來家法十餘事書于記注

高太后

宋史元祐八年九月太皇太后高氏崩九年上尊號曰宣仁聖烈太皇太后薨永裕陵后

亳州人英宗后也曾祖瓊贈魏王謚武烈

三后

岳珂魏郊錄本朝帝后廟謚率聯一字深得古意真

宗謚章聖后曰章獻明肅仁宗謚聖武后曰慈聖光獻英宗謚宣孝后曰宣仁聖烈永昭

宋史本紀

仁宗葬

永昭陵

却狄安諸夏先王社稷臣固應祠百世何止活千人定策天知我忘家帝念親萬方何以報得疾為勤民

先王

東都事略高瓊燕人父乾徙亳州之蒙城事太宗于潛邸景德初契丹入寇真宗親征有勸帝

南遷者瓊言契丹師衆已老宜親臨觀兵督其成功真宗幸澶州瓊固請渡河至浮橋駐輦未進瓊乃執搥祝輦夫之背曰何不亟行今已至此復何疑真宗乃命進輦既至登北門城樓張黃龍旂將士皆呼萬歲氣勢百倍

定策

宋史哲宗為神宗第六子生熙寧契丹遂退九年初封均國公元豐五年進封

延安郡王八年二月神宗不豫猶未立太子也皇太后垂簾福寧殿諭宰相王珪等奉制立延安為太子

四日而神宗晏駕邵氏見聞後錄引哲宗實錄云神宗彌留后勅中人梁惟簡令製一黃袍十歲兒可衣者蓋為上倉卒踐阼之脩神宗太母所以屬意于上者確然先定無纖芥可疑邢恕者傾危士也反謂后欲捨延安而立其子顥賴已及章惇蔡確得無變王定國聞見錄武臣王棫為邢恕教令重誣宣仁于哲宗有異心起又教蔡渭等上書論元祐及元豐末事其書一篋皆恕手筆械于哲宗朝得閣門職名○慎按小人樹黨冒恩敢於離間骨肉構造無根釀成殃禍始謀者蔡確而成于傾邪罔上之邢恕侵尋至于蔡卞甚且創造廢聖母之議賴哲宗仁孝不納其言不然宣仁被誣幾不白于身後先生詩云定策天知我其旨微矣

附子由二首

內治隆三世尊臨極九年神孫克負荷大業付安
全有道華夷靖無心怨惡悛和熹盛東漢從此不
稱賢

約已心全小寬民德有餘外家恩澤少先後禮容

虛原廟因前室中朝避冊書功名不勝紀四謚歎

猶踈

自注近以四謚進呈上嘆曰太
皇太后盛德豈四字所能盡

再次韻曾仲錫荔支

柳花著水萬浮萍荔實周天兩歲星

公自注柳至易成
飛絮落水中經宿

即為浮萍荔支難長
至二十四五年乃實

本自玉肌非鵠浴至今丹殼似猩

刑侍郎賦咏窮三峽妃子煙塵動四溟莫遣詩人說功
過且隨香草附騷經

丹殼

荔支譜有蚶殼之名詳見
本卷後次韻劉燾詩注中

次韻滕大夫三首

雪浪石

太行西來萬馬屯勢與岱岳爭雄尊飛狐上黨天下脊
半掩落日先黃昏削成山東二百郡氣壓代北三家村

千峯石卷矗牙帳崩崖鑿斷開土門竭來城下作飛石
一礮驚落天驕魂承平百年烽燧冷此物僵卧枯榆根
畫師爭摹雪浪勢天工不見雷斧痕離堆四面繞江水
坐無蜀士誰與論老翁兒戲作飛雨把酒坐看珠跳盆
此身自幻孰非夢故國一作山水聊心存

滕大夫

名興公字希靖時與李端叔同為定州倅見姑溪集

雪浪石

本集雪浪齋銘序云

予于中山得黑石白脉如蜀孫位孫知微所畫石間奔流盡水之變又得白石曲陽為大盆以盛之激水其上名其室曰雪浪齋名勝

飛狐

元和郡縣志蔚州飛狐縣縣北有飛

志雪浪齋故址在文廟後

狐口邢厲曰古長城在飛狐界漢書酈食其說漢王曰杜白馬之津塞飛狐之口皆一方之阨也亦謂之

飛狐道 **上黨** 九域志河東路龍德府潞州上黨郡昭德軍節度使釋名曰黨所也在山上其所最

高故曰 **代北** 漢書梅福曰代谷者恒山在其南雁塞工黨 在其北上谷在東代郡在西元和郡縣

志代州雁門郡春秋晉地隋開皇五年置代州北至朔州一百二十里○按定州在代之北故云 **三**

家村 唐王季友詩百 **土門** 太平寰宇記井陘口今名姓惟有三家村 **土門** 口即太行八陘之第

五陘也因學紀聞土門口在 **礮石** 潘岳賦礮鎮州獲鹿縣即井陘關也 **礮石** 雷駭

附子由次韻

謫居杜老嘗東屯波濤繞屋知龍尊門前石岸立

精鐵潮汐洗盡莓苔昏野人相望夾水住扁舟時
過江西村窗中縞練舒眼界枕上雷霆驚耳門不
堪水怪妄欺客欲借楚些時招魂人生出處固難
料流萍着水初無根旌旗旋逐金鼓發蓑笠尚帶
風雨痕高齋雪浪卷蒼石北叟未見疑戲論激泉
飛水行亦凍窮邊臘雪如翻盆一杯徑醉萬事足
江城氣味猶應存

附李端叔次韻

從姑溪
集采出

風波末路方奔屯屹然不動誰如尊豈知胸中皦
十日顧盼不接無重昏東觀海市俯弱水南登赤
壁凌江村斯文未喪天豈遠出沒狐鼠徒千門綸
巾羽扇晚自得已聞漠北無游魂由來妙趣入造
化地靈特出雲濤根平生到處若再歷隱隱似有
履齒痕玻瓈鏡裏萬象發金粟堂中千偈論會須
白玉漱寒水更借落月傾金盆咄嗟菱溪成底物
混沌空誇竅鑿存

附晁无咎次韻

從難助
集采出

居庸滅烽惟留屯時平更覺將軍尊鈴齋看雪擁
衲坐急鼓又報邊城昏百壺高晏梨栗圃千里未
盡桑麻村天憐公老無以樂一星飛墮從天門得
毋遺履穀城化恐是喫草金華魂不然荆棘霜露
底兀爾奇怪來無根女媧擣鍊所遺棄奔淥尚有
河漢痕豈其謀國坐不用聊以永日寧復論跳梁
不憂牧並塞綏納可使魚游盆公歸廊廟誰得挽

此石萬古當長存

附秦少游次韻

從淮海後集采出

漢廷公卿如雲屯結綬彈冠朝至尊登高履危足
在外神色不變惟伯昏金華掉頭不肯住乞身欲
老江南村天恩許兼兩學士將兵百萬守北門居
士強名曰天元二字疑有訛寤寐山水勞心魂高齋引
泉注奇石迅若飛浪來雲根朔南修好八十載兵
法雖妙何足論夜闌番漢人馬靜想見雉堞低金

盆報罷五更人吏散坐調一氣白元存

慎按少游詩根字韻下脫

去二句須查善本補入

附張文潛次韻

從張右史集采出原題
和定州端明雪浪齋

中山士馬如雲屯號令惟覺將軍尊
能旂犀甲羅左右金鉦鳴鼓喧
朝昏少年猷畝老為將誰能復
記躬耕村東坡先生事業異道峻
不得安修門眼前富貴念不起
惟有山林勞夢魂榛中奇石安至
此坐蒙湔洗見本根奔流驟浪勢
萬里至畫乃掃

筆墨痕黃牛三峽固細事赤壁長江何足論能令
萬古蛟蜃怪么麼入此玻璃盆扁舟獨往則不可
平生致君言具存

同前

我頃三章乞越州欲尋萬壑看交流且憑造物開山骨
已見天吳出浪頭

公自注石中有海獸形狀似

履道鑿池雖可致玉

川卷地若為收洛陽泉石今誰主莫學癡人李與牛

附李端叔次韻

姑溪集原題次韻東坡
和滕希靖雪浪石詩

平生所願識荊州別乘還容接勝流異石朋騰驚海面新詩清絕似槎頭常嗟盛世千年隔誰謂餘光一旦收便覺詩源得三昧目中無復有金牛

沈香石

壁立孤峰倚硯長共疑沈水得頑蒼欲隨楚客紉蘭佩誰信吳兒是木腸山下曾逢化松石玉中還有辟邪香早知百和俱灰燼未信人言弱勝剛

附李端叔次韻

海南枯朽插天長
歲久峰巒帶蘚蒼
變化那知斲
山骨儀刑兀自在
人腸幾因曉日疑
銷蠟試沃清
泉覺弄香
遮莫輕珉忘什襲
須防偷眼誤推剛

石芝

并引

予嘗夢食石芝作詩記之今乃真得石芝于海上子
由和前詩見寄予頃在京師有鑿井得如小兒手以
獻者臂指皆具膚理若生予聞之隱者此肉芝也與
予由烹而食之追記其事復次前韻

土中一掌嬰兒新爪指良是肌骨勻見之怖走誰敢食
天賜爾我不及賓旌陽遠游同一許長史玉斧皆門戶
我家韋布三百年祇有陰功不知數跪陳八簋加六瑚
化人視之真塊蘇肉芝烹熟石芝老笑唾熊掌嘖雕胡
老蠶作繭何時說夢想至今空激烈古來大藥不可求
真藥當如磁石鐵

石芝

抱樸子仙藥篇五芝者有石芝草芝肉芝木芝
菌芝各有百許種石芝生于海隅名山赤者如

珊瑚白者如截肪黑者如澤漆青者如翠羽黃者如
紫金皆光明洞徹如堅冰本集北海十二石記云登

州下臨大海沙門鼉磯車牛大竹小竹儿五島惟沙
門最近兀然焦枯餘皆紫翠巉絕神仙所宅也上生
石芝草木皆奇麗多不識名者先生又自題石芝詩
云中山教授馬君大登人也嘗得石芝食之故作此
篇同賦
肉芝
抱樸子肉芝者謂萬歲蟾蜍頭上有角
一篇
額下有丹書八字者或千歲蝙蝠色白
如雪或行山中見小兒乘車馬長七八寸者肉芝也
凡此共百二十種茗溪漁隱叢話按仙傳拾遺載進
士蕭靜之掘地得物類人手肥嫩色微紅烹而食之
後遇其人曰嘗食仙藥因告之曰肉芝食之者壽何
東坡忘
此耶

按子由和詩附見第
二十卷黃州條下

鶴歎

園中有鶴馴可呼我欲呼之立坐隅鶴有難色側睨予
豈欲臆對如鵬乎我生如寄良畸孤三尺長脰閭瘦軀
俛啄少許便有餘何至以身為子娛驅之上堂立斯須
投以餅餌視若無憂然長鳴乃下趨難進易退我不如
按唐子西語錄云東坡作病鶴詩嘗寫三尺長頸瘦
軀缺其一字使仕德翁輩下之凡數字東坡徐出其
藁蓋閭字也此字既出儼然如見病鶴矣今題中無
病字疑有脫落也又猗覺寮雜記云世說有遺支道
林雙鶴者道林曰既有凌霄之姿何肯為人
作耳目玩詩中何至以身為子娛正用此

送曾仲錫通判如京師

邊城歲暮多風雪強壓春

一作香

醪與君別玉帳夜談霜

月苦鐵騎曉出河水裂斷蓬飛葉捲黃沙祇有千林鬢
鬆花應為王孫朝上國珠幢玉節與排衙左援公孝右
孟博我居其間嘯且諾僕夫為我催歸來要與北海春
水爭先回

玉帳

唐書藝文志李靖有玉帳經一卷袁卓遁甲專
征賦或傍直使之游宮或居貴神之玉帳張湜

雲谷雜記玉帳乃兵家厭勝之方位主將於其方置
軍帳則堅不可犯如玉帳然其法以月建前三位取
之如正月建寅則已為玉
帳主將宜居之餘推此

和錢穆父送別并求頻遞酒

聯鑣接武兩長身，鷁鷺行中笑語親。
九子羨君門戶壯，八州憐我往來頻。
佇聞東府開賓閣，便乞西湖洗塞塵。

公自注本欲乞鑑湖就東府對耳

更向青齊覓消息，要知從事是何人。

頻遞酒

未詳

八州

先生歷知密徐湖登抗潁揚定八州

劉醜廝詩

劉生望都民，病羸寄空室。
有子曰醜廝，十二行操瓢。
墻間得餘粒，雪中拾墮糲。
飢飽共生死，水火同焚漂。
病翁

恃一褐度此積雪宵哀哉二暴客掣去如飢鴉翁既死

于寒客亦易此齟崎嶇走亭長不憚雪徑遙我仇祝與

苑

一作宛

物色同遮邀行路為出涕二客竟就臬譏譏訴

我庭慷慨驚吾索

一作僚

曰此可名寄追配柳之蕘恨我

非柳子擊節為爾謠官賜二萬錢無家可歸嬌為媼他

日婦婉然初垂髻洗沐作小史

一作史

裏頭束其腰筆硯

耕學苑弓

一作戈

矛戰天驕壯大隨爾好忠孝福可徼相

國有折脇封侯或吹簫人事豈易料勿輕此

一作比

焦僥

望都

水經注博水出望都縣東南流逕其縣故城帝王世紀堯母慶都出觀三河赤龍與合而生堯

有望都山太平寰宇記即都山也堯母望之故以望都為名元和郡縣志望都縣西南至定州五十里

諂諂

揚子諂諂者天下皆訟也奚其存

柳之莧

事詳柳子厚集中

題毛女真

霧鬢風鬟木葉衣山川良是昔人非祇應聞過商顏老

獨自吹簫月下歸

毛女

抱樸子漢成帝時有獵者于終南山中見一人無衣服身生黑毛踰坑越谷有如飛騰密伺其

所在乃是婦人言本是秦之宮人入山飢無所食有一老翁教我松葉松實食之遂不飢不渴冬不寒夏

不熟計此女是子嬰宮人至成帝之世三百許歲向使不為所得便成仙矣王氏原注引列仙傳毛女字玉姜在華陰山中自言始皇

商顏老

水經注楚水源出上洛縣西南

宮人與此小異未詳孰是
楚山其水兩源合于四皓廟東高士傳南山曰商山亦名楚山漢四皓河內軹人避秦于商山故老傳云商州有商君商谷商塞商密商顏曰五商漢武帝時臨晉民引洛水至商顏下岸為水齧易致崩顏自此商顏半成水豬矣

寄餽合刷餅與子由

老人心事日摧顏宿火通紅手自培小甑短餅良具足
穉兒嬌女共燔煨寄君東閣閒烝栗知我空堂坐畫灰

約東家僮好收拾故山梨棗待歸來

烝栗

杜甫詩山家烝栗暖

畫灰

白居易詩對雪畫寒灰

次韻子由清汶老龍珠丹

天公不解防癡龍玉函寶方出龍宮雷霆下索無處避
逃入先生衣袂中先生不作金椎袖玩世徜徉隱屠酒
夜光明月空自投一鍛何勞緯蕭手黃門寡好心易足
荊棘不生梨棗熟玄珠白壁兩無求無數一作脛金丹來
入腹區區分別笑樂天那知空門不是仙

清汶老

失考

玉函寶方

隋書經籍志玉函寶方五卷葛洪撰

龍宮

續仙傳孫思邈

故一小蛇月餘出行見一白衣少年引入涇陽水府一女子命其子取龍宮藥方三十首與先生俄送歸

山歷試諸方皆若神效後著千金方三十卷散龍宮方在其內金椎袖漢書淮南厲王傳辟疆出

見之即自袖金椎推之

荆棘梨棗

真誥紫微王夫人授許長史曰火棗交梨之樹已生君心

中可翦荆棘令此樹單生

無脰

會稽典錄孔融與曹操書曰珠玉無脰而自至者以人好之也

按藥城集中失原作當覓善本采補

次韻子由書清汶老所傳秦湘二女圖

春風消水失瑤玉我本無身安有觸羊生得婦如得風

握手一笑未為辱先生室中無天遊珮環何處鳴風甌
隨魔未必皆魔女但與分燈遣歸去胡為寫真傳世人
更要維摩一轉語丹元茅茨祇三間太極老人時往還
檢點凡心早除拂方平神鞭常使物

無身有觸

楞嚴經物不觸知身知有觸知身即觸知觸即身即觸非身即身非觸身觸二相原

無處所又云舜若多神無身覺觸如來光中映令暫見既為風質其體元無注云舜若多主空神也其質如風而

魔女分燈

維摩經魔波旬從萬二千天女維摩詰謂曰諸姊有法門名無盡燈

譬如一燈然千百燈冥者皆明明終不盡天女聞言已禮維摩詰足隨魔而去

按樂城集此章

亦失去原作

紫團參寄王定國

谿砢土門口突兀太行頂
豈惟團紫雲實自俯倒景
剛風被草木真氣入荅穎
舊聞人銜芝生此羊腸嶺
纖纖撼虎豹鬣威縮龍蛇
癭蠶頭試小嚼龜息變方
騁矧予明真子已造浮玉
境清宵月掛戶半夜珠落
井灰心寧復然汗喘久已
靜東坡猶故目一作日
北藥致遺秉欲持三
桮根往侑九轉鼎為予置
齒頰豈不賢酒茗

紫團參

瑞應錄唐明皇潛路邸重九登壺闌山東北有紫雲見光彩照日因名紫雲山即紫團也

太平寰宇記河東道上黨郡有紫團山地理志云出人參草

土門口

即井陘關詳見本卷前雪

浪石詩注中

羊腸嶺

太平寰宇記河東道羊腸山在交城縣東南五十里萬根谷山即羊腸坂

也石磴紫紆若羊腸地理志云上黨壺關亦有羊腸坂在今潞州界

次韻劉燾撫勾蜜漬荔枝

時新滿座聞名字別久何人記色香葉似楊梅蒸霧雨
花如盧橘傲風霜每憐蓴菜下鹽豉肯與葡萄壓酒漿
回首驚塵卷飛雪詩情真合與君嘗

劉燾

吳興掌故集劉燾元祐三年東坡知貢舉稱其文章典麗遂中甲科尤善書仕至秘閣脩撰所

著有見南山集五十卷宜翁之子也吳興備志劉燾以書名世太清樓續閣帖劉燾無言模刻○慎按施

氏原注劉燾字無言長興人諸父宜翁行甫昔從先生游事見送劉行甫寺丞赴餘姚詩注無言在太學

有俊聲善筆札黃魯直稱之謂他日江南復有羊欣薄紹之矣時在山中以行飛缺此段新刻刪去今補錄

据此無言乃宜翁之姪與撫勾職官分紀安撫使屬吳興掌故不同兩存俟考

閭門狹候充時新聞名按薛能荔支詩歲杪監州曾見樹

紫江家綠游家紫藍家紅何家紅綠核圓丁香虎皮牛心蚶殼龍牙中元紅玳瑁紅十八娘火山等名共

三十種花葉荔支譜其花春生藪藪然白色春雨之際二種花葉旁出新葉色紅白六七月色變綠此明年

開花
者也

立春日小集戲

一作
呈訛

李端叔

白髮已十載青春無一堪不驚新歲換聊與故人談
健民聲喜鴉嬌雪意酣霏微不到地和暖要宜蠶歲月
斜川似風流曲水慙行吟老燕代坐睡夢江潭承掾頗
哀援一作亮歌呼誰怕參衰懷久灰槁習氣尚饒貪白啖
本河朔紅消真劍南一本作熊白來河
北猶紅削劍南辛盤得青韭臘
酒是黃甘歸卧燈殘帳醒聞葉打庵須煩李居士重說

後三三

李端叔

按東都事略李之儀傳元祐中以編修官赴定州幕孔常父有癸酉十月送李端叔機宜詩

張耒宛丘集送李端叔序云元祐八年蘇先生守定
武士願從者半朝廷然皆不敢有請先生一日言於
朝言請以端叔佐幕府先生之位未能進退天下士
故用子如此然其意可知也挾端叔之學問文章而
從先生如決大川而放之海余無以贊子矣又端叔
姑溪集題跋一條云余從蘇先生於定武蜀人孫子
發亦辟在幕府滕興公曾仲錫為倅五人者每辨色
會于公廳領所事竟按前所約之地窮日力盡歡而
罷或夜則以曉角動為期方從容賦咏明年五月先
生遂謫嶺南矣以上數則皆端叔在定州事故備錄
之

承掾哀援

茗溪漁隱云東坡立春詩承掾頗哀亮
定武有此碑東坡自大字寫之作亮字

後漢馬援傳諸曹時白外事援輒曰此丞掾之事何足相煩頗哀老子使得遨遊則亮字當作援也○慎按援字去聲讀別本作亮者訛今駁正後三三施氏原註顧禧云此詩三語讀者往往不知何謂蓋端叔在定武幕中特悅營妓董九者故用九數以為戲爾聞其說于強行甫云按題云戲端叔與結處正合特采錄之

次韻曾仲錫元日見寄

蕭索東風兩鬢華年年幡勝翦宮花愁聞塞曲吹蘆管

喜見春盤得蓼芽吾國舊供雲澤米

公自注定武齋酒用蘇州米

君

家新致雪坑茶

公自注近得曾坑茶

燕南異事真堪紀三寸黃甘

擘永嘉

春盤

四時寶鏡立春日春餅生菜號春盤又撫遺曾東晉李郢立春日命以蘆菹芹芽為菜盤

坑

蔡忠惠集引朱子安東溪試茶錄云北苑鳳凰山連屬諸焙所產者味佳慶歷中歲貢又有曾坑上

品一斤又云馬鞍山東為杜園最高處為曾坑

三寸黃甘

南史宋劉義康時四方獻饋皆以上

品薦之而以次者供御文帝嘗冬月噉甘嘆其形味並劣義康遣還東府取甘供御大者三寸韓彥直橘錄橘出永嘉郡甘乃其別種而乳甘為第一故温州謂乳甘為真甘溫四邑皆種甘者而出泥山又推第一大者可七寸圍顆皆圓正膚理如澤蠟擘之香霧嘆人

子由生日以檀香觀音像及新合印香銀篆盤為

壽一首

梅檀婆律海中芬
西山老臍柏所薰
香螺脫麝來相羣
能結縹緲風中雲
一燈如螢起微焚
何時度盡繆篆紋
繚繞無窮合復分
綿綿浮空散氤氲
東坡持是壽卯君
君少與我師皇墳
旁資老聃釋迦文
共厄中年點蠅蚊
晚遇斯須何足云
君方論道承華勛
我亦旗鼓嚴中軍
國恩未一作當報敢不勤
但願不為世所醺
爾來白髮不可耘
問君何時返鄉枌
收拾散亡理放紛
此心實與香

俱爲聞思大士應已聞

子由生日

按子由已卯二月二十日生見本集十八羅漢頌跋

旃檀

法華經牛頭旃檀從

離垢出若以塗身火不能燒

婆律

本草拾遺婆律香出婆律國樹與龍腦同香乃樹之清脂也

香螺脫鱗

唐本草蠱類生雲南者如人掌青黃色按韻書蠱亦作螺韓鄂四時纂要有修甲香

方收大甲酒煮蜜熬入諸香用所云甲者即螺鱗也

皇墳

韓愈詩高蠅蚊詩蠅

蚊滿八區可盡與相格

慎按諸刻本詩中繚繞無窮合復分之下直接東坡持是壽卯君云云脫去綿綿浮空散氤氲一句今從施氏原本補入

附子由次韻

日月中人照與芬心虛慮盡氣則薰彤霞點空來
羣羣精誠上徹天無雲寸田幽闕煥不焚眇眇中
外絳錦紋冥然物我無復分不出入常氤氲道
師東西指示君乘此飛仙勿留墳茅山隱居有遺
文世人心動隨蚩蚊不信成功如所云蚤夜賓餞
同華勛爾來僅能破魔軍我經生日當益勤公稟
正氣飲不醺梨棗未實要耒耜日云暮矣收桑粉

西還閉門止紛紛憂愁真能散淒煮萬事過耳今

不聞

自注登真隱訣云日中青帝曰照龍韜其夫人曰芬豔嬰

次韻李端叔送保倅翟安常赴闕兼寄子由

中山保塞兩窮邊卧治雍容已百年顧我迂愚分竹使
與君談笑用蒲鞭松荒三徑思元亮草合平池憶惠連
白髮歸心憑說與古來誰似兩疏賢

翟安常

爵里失考

保塞

輿地廣記保塞縣本漢涿郡之樊輿中山之北新城地廢置不常建

隆元年以清苑縣地置保塞軍領縣一丈獻通考保州本唐莫州清苑縣地宋初置保塞軍太平興國中

升為州九域志河北西路保塞軍西至定州一百六十里羅子蒼拾遺五代失險周世宗于深冀間浚河為限宋守塘灤而雄霸二州間塘水不接遂置保定軍為窮邊以無水多植榆槐為蔽云

按姑溪集中失原作無從來錄

中山松醪寄雄州

一無州字

守王引進

鬱鬱蒼髯千歲姿肯來杯酒作兒嬉流芳不待龜巢葉

公自注唐人以荷葉為酒杯謂之碧筒飲掃白聊煩鶴踏枝醉裏便成歌雪

舞醒時與作嘯風辭馬軍走送非無意玉帳人間合有

詩

中山松醪

本集有賦
不具錄

雄州

九域志河北東路雄州防
禦治歸義容成二縣太平

寰宇記雄州本涿州歸義縣之瓦子濟橋舊置瓦
橋關五代周時始立雄州以有大小雄山而名

王

引進

按子由使契丹時有贈知雄州王崇拯七言律
詩二首詩話總龜王崇拯字拯之當即其人又

按宋史職官志引進使從五品掌臣僚蕃國
進奉禮物之事職官分紀引進有正使副使

次韻李端叔謝送牛戩鴛鴦竹石圖

聞君談西戎廢食忘早晚王師本不陳賊壘何足剗守

邊在得士此語要而簡知君論將口似予

一作我

識畫眼

笑指塵壁間此是老牛戩平生師衛玠非意嘗理遣想

君定何人未用市朝顯置之勿復道世俗固多舛歸去
亦何須單車度穀澠如蟲得羽毛已脫安用繭家書空
萬軸涼暴一本作晒困舒卷念當掃長物閑息默自煖
此畫聊付君幽處得小展新詩勿縱筆羣吠驚邑天時
來未可知妙斲待輪扁

牛戩

米海岳畫史道士牛戩筆墨粗豪放縱亦不俗固在艾宣惠崇寶覺張經之上也

按姑溪集此詩失去原作無從采錄

次韻聽上人見寄

前身

周益公題跋
引此詩作生

本同社宿業獨臨邊一悟鏡空老始

知圓澤賢歸心忘犢佩生術寄羊鞭不似歐陽子空留

六一泉

聰上人

本集思聰名說云法惠圓師小童彭九年十
一善琴應對明了如成人自言未有法名而

同師皆聯思字遂與名思聰庶幾他日因聲以得法
周益公跋云元祐六年公既作聞復字序後三年春
在定武復和其見寄詩有前生本同社之語又後七
年當靖國辛巳蓋公夢奠之歲也其贈道通詩猶云
雄豪而妙苦而腴祇有琴聰與蜜殊其愛重之如此
長公外紀云大觀政和間聰挾琴遊梁久之遂還俗
為御前使臣方其將冠巾也叔黨送之詩云
試誦北山移為我招琴聰詩至已無及矣

次韻王雄州還朝留別

老李威名八十年，壁間精悍見遺顏。
自聞出守風流似，稍覺承平氣象還。
但遣詩人歌杕杜，不妨侍女唱陽關。
內朝接武知何日，白髮羞歸供奉班。

老李

東都事畧李允則字垂範太原人真宗朝奉使諸路雄州再涖焉周世宗始以瓦橋關置州民

居維結茅允則易以瓦甍又合內外舊甕城與大城為一創闢城濬濠起月隄徙浮圖于北原上所望踰三十里契丹動靜皆知之當時邊臣無及者子由洛陽李氏園池記云李氏世家名將大父濟州于太祖為布衣之舊用兵河東百戰百勝烈考寧州事章聖守雄州十有四年繕守脩撫士卒精于用間功烈尤

雄○按所稱濟州乃允則之父謙溥寧州即允則也內朝春明退朝錄本朝文德殿曰外朝凡不釐務官日赴是為常朝垂拱曰內朝宰臣以下並武班日赴是為常起居

三月二十日多葉杏盛開

零露泣月蕊溫風散晴葩春

一作天

工了不睡連夜開此

花芳心誰翦刻天質自清華惱客香有無弄粧影橫斜

中山古戰國殺氣浮高牙叢臺餘袷服易水雄

一作雜

悲

始自從此花開玉肌洗塵沙坐令游俠窟化作溫景家
我老念江海不飲空咨嗟劉郎歸何日紅桃爍殘霞明

年花開時舉酒望三巴

公自注欲請梓州而歸

多葉杏

元方輿勝覽大興府海雲寺有多葉杏三株名芙蓉杏張叔夏見之為填三姝媚詞

剪

刻

韓愈杏花詩剪刻作此連天花

慎按施氏原注脫落劉郎歸何日二句今据別本補入

三月二十日開園三首

雪髯霜鬢語儻獐淡蕩園林取次行要識將軍不凡意

從來祇啜小人羹

公自注是日散父老酒食

西園牡蒿夜沈沈尚有游人卧柳陰鶴睡覺時風露下

落花飛絮滿衣襟

鬱鬱蒼髯真道友絲絲紅萼是鄉人

公自注蒼髯松也紅萼海棠也

何

時翠竹江村路送我柴門月色新

次韻王雄州送侍其涇州

威聲又數中興年二虜行當一矢聯聞道名城得真將
故應驚羽落空弦追鋒歸去雄三衛授鉞重來定十連
別酒回頭便陳迹號呶端合發初筵

侍其

複姓也名失考宋史有侍其曙侍其淵

涇州

九域志秦鳳路涇州安定郡治保安縣太

平寰宇記涇州屬關西道漢分秦北郡地置安定郡河西六郡之一也魏神麌二年於此置涇州因水為名宋為彰化軍節度水土三衛晉書職官志文帝初雜于河西人烟接于北地

三衛

晉書職官志文帝初置中衛將軍武帝分

左右衛

初貶英州贈馬夢得

萬古仇池穴歸心負雪堂殷勤竹裏

一作

夢猶自數山

王

貶英州

宋史哲宗本紀紹聖元年知定州蘇軾坐前掌制命語涉譏訛貶知英州本傳紹聖初以

本官知英州尋降一官貶寧遠軍節度副使惠州安置危素東坡書院記紹聖元年四月公以侍御史虞

榮來之邵言落職奪一官知和州尋知英州六月惠
州安置十月至惠州本集有乞舟行赴英州狀九域
志廣南東路英州軍事治真陽縣太平寰宇記廣州
須陽縣地漢舊縣梁改東衡州隋開皇十年廢為真
陽縣偽漢乾和五年于此
置英州去東京四千里

慎按此詩施氏原本在遺詩卷中今據時地
移編于此

臨城道中作

并引

予初赴中山連日風埃未嘗了了見太行也今將適
嶺表頗以是為恨過臨城內丘天氣忽清徹西望太

行草木可數。岡巒北走崖谷，秀傑忽悟，歎曰：「吾南遷其速，返乎退之衡山之祥也。」書以付邁使志之。

逐客何人，着眼看太行，千里送征鞍，未應愚谷能留柳。

可獨衡山解識韓

臨城

太平寰宇記：臨城屬趙州，在定州西南一百里。漢于此置房子縣，天寶元年改臨城。內丘

太平寰宇記：漢中丘縣，隋改內丘，屬趙州。太行

述征記：太

大業二年，改屬邢州，在州西南五十八里。太行

愚谷

水經注：時水又屈而逕社山北。

行山首始于河內北至幽州。凡百嶺，遠亘十三州之界，有八陁。愚谷

有愚公谷。齊桓公時，公隱于谷，隣有認其駒者，公以與之。太平寰宇記：愚公谷在臨淄縣本社，山名愚公。

山愚公谷柳子厚愚溪詩序余以觸罪謫瀟水上爰是溪家焉古有愚公谷故更之謂愚溪

過湯陰市得豌豆大麥粥示三兒子

朔野方赤地河壩但黃塵秋霖暗豆莢

一作漆

夏旱臞麥

人逆旅唱晨粥行庖得時珍青斑照匕箸脆響鳴牙齦

玉食謝故吏風餐便逐臣漂零竟何適浩蕩寄此身爭

勸加餐

一作飲

食實無負吏民何當萬里客歸及三年新

湯陰

元和郡縣志相州湯陰縣有蕩水因以為名太平寰宇記蕩水在縣治北縣在相州南四十里

豌豆

爾雅謂之戎菽遼志謂之回鶻豆本草其苗柔弱宛宛然故得名嫩時色綠老則斑麻

被命南遷途中寄定武同僚

人事千頭及萬頭得時何喜失時憂只知紫綬三公貴
不覺黃粱一夢游適見恩綸臨定武忽遭分職赴英州
南行若到江干側休宿潯陽舊酒樓

慎按此詩施氏原本不載新刻在續補下卷
今據題移編于此

子由新修汝州龍興寺吳畫壁

丹青久衰工不藝人物尤難到今世每摹市井作公卿

畫手懸知是徒隸吳生已與不傳死那復典刑留近歲

人間幾處變西方畫

一作畫

作波濤翻海勢細觀手面分

轉側妙算毫釐得天契始知真放本精微不比狂花生
客慧似聞遺墨留汝海古壁蝸涎可垂涕力捐金帛扶
棟宇錯落浮雲卷新霽使君坐嘯清夢餘幾疊衣紋數
衿袂他年弔古知有人姓名聊記東坡弟

龍興畫壁

藥城後集汝州龍興寺修吳畫殿記云紹聖元年四月予謫守汝陽與通守李君純

繹游龍興寺觀華嚴小殿其東西夾皆道子所畫東為維摩文殊西為佛成道屋瓦弊漏塗棧缺弛幾侵

于風雨時有僧惠真方葺寺大殿乃使先治此予與
李君亦少助焉不踰月堅碩如新于殿脊中得記曰
治平丙午蘇氏維政所葺衆異之謂前後葺此皆蘇
氏豈偶然哉○慎按明道雜志以龍興寺為天慶觀
又云上人于殿脊上火珠中見有書字記建殿年月
後復書曰某年月日有姓蘇人重修與子由所記不
同當以樂狂花以發勞則于虛空別見狂華
城集為正

汝海

十三州志梁縣周南鄙邑秦滅周遷其人於此謂之
陽人聚元和郡縣志河南道汝州臨汝郡漢河南郡
之梁縣地隋開皇四年移伊州理
于此大業中改汝州以汝水為名

慎按宋史哲宗本紀紹聖元年二月以鄧潤甫為尚
書左丞三月蘇轍罷知汝州先生南遷時子由已到

汝州
任矣

過高郵寄孫君孚

過淮風氣清一洗塵埃容水木漸幽茂菰蒲雜游龍可
憐夜合花青枝散紅茸美人游不歸一笑誰當供故園
在何處已偃手種松我行忽失路歸夢山千一作千山重聞

君有負郭二頃收橫縱卷野畢秋穫殷牀聞夜舂樂哉
何所憂社一作杜酒粥面醲宦游豈不好毋令到千鍾

高郵

太平寰宇記淮南道揚州領縣七
高郵其一也宋割高郵縣建軍

孫君孚

東都事畧

孫升字君孚初以天章閣出知應天後貶果州團練
副使汀州安置劉延世孫公談圖序云紹聖改元凡

仕于元祐而貴顯者例皆竄貶湖南嶺表獨孫公一人遷于臨汀公元祐時歷三院遷左史為中書舍人忤時宰以集賢修撰留守南都後遷天章閣待制其謫官也自南都為歸州遂以散秩謫臨汀在汀二年以疾終公諱升字君孚高郵人○慎按劉述之與孫同時孫謫汀州劉時官長汀縣故其所述視史加詳東坡南行過高郵正君孚謫歸州時也君孚名升兩處皆同施氏原注謂君孚名叔者訛今駁正

合花

崔豹古今注欲蠲人之忿則贈以青囊夜合其葉至暮即合故名合昏又云夜合本草此樹葉

似皂莢及槐五月花紅白色上有絲茸

僕所至未嘗出游過長蘆聞復禪師病甚不可不一問既見則有問矣明日阻風復留見之作三絕

句呈聞復並請轉呈參寥子各賦數首

亦知壺子不死敢問老聃所遊瑟瑟寒松露骨耿耿老

病一作虎垂頭

長蘆

吳船錄長蘆寺為達摩一葦浮渡處傳法正宗記初達摩于梁普通元年泛海至廣州刺史蕭

昂表聞次年十月至建康武帝召對祖知初機不契是月潛之江北後人于渡處創長蘆院續燈錄真州長蘆崇福禪院祖印禪師

名智福所建師江州人

聞復

名思聰詳見本卷前聰上人詩注中

莫言西蜀萬里且到南華一游扶病江邊送客杖屨浦

口回頭

南華

始興志南華寺在縣南六十里峯巒環抱狀如蓮花其東南曹溪之水出焉梁時天竺僧智藥

至溪口聞水香掬而飲之曰此水上流有勝地遂謁土人曹叔良叔良者魏武之裔孫也因捨宅為寺唐儀鳳間盧惠能傳黃梅衣鉢居之是為六祖

老去此生一訣興來明日重游卧聞三老白事半夜南

風打頭

打頭風

猗覺寮雜記風之逆者舟人謂之打頭風元微之詩江喧過雲雨船泊打頭風白樂天詩

白蘋香處

打頭風

六月七日泊金陵阻風得鍾山泉公書寄詩為謝

今日江頭天色惡礮車雲起風欲作獨望鍾山喚寶公
林間白塔如孤鶴寶公骨冷喚不聞却有老泉來喚人
電眸虎齒霹靂舌爲予吹散千峯雪一作雲南行萬里亦
何事一酌曹溪知水味他年若畫蔣山圖爲一作仍作泉
公喚居士

泉公

傳燈錄蔣山佛慧禪師名法泉生隨州時氏出家博極羣書過目成誦號雅泉萬卷熙寧中住

鍾山礮車雲

國史補暴風之候有礮車雲王直方詩話舟人占雲若礮車起急避之

寶公

白塔

僧史寶公大士諱寶誌手足鷹爪初建康朱氏婦聞兒啼鷹巢中梯樹得之養以爲子七歲依

鍾山僧儉出家梁天監初卓錫于鍾山十三年入滅
薨定林寺前獨龍岡建塔五層塔前建開善寺勅王
筠撰虎齒山海經云西王母狀如人狗尾蓬頭戴勝
碑文善嘯穆天子傳注云西王母虎齒蓬髮施
氏原注牽混為曹溪注見前首
一今為詳析南華下

贈清凉寺和長老

代北初辭沒馬塵江南來見卧雲人問禪不契前三語
施佛空留丈六身老去山林徒夢想雨餘鐘鼓更清新
會須一洗黃茅瘴未用深藏白氎巾

清凉寺

金陵梵刹志石頭山清凉寺在府城西清凉
門內古清凉山吳順義中徐溫建為興教寺

南唐改為石頭清凉大道場宋太平興國五
年改清凉廣惠禪寺南渡後重修陸游有記

和長老

失施佛

本集阿彌陀佛贊序云蘇軾之妻王氏名閔之年四十六元祐八年八月卒于京師臨終

之夕遺言捨所受用使其子邁迨過為畫阿彌陀佛
紹聖元年六月九日像成奉安于金陵清凉寺贊中
又有大六金身
不為大之語

予前後守倅餘杭凡五年夏秋之間蒸熱不可過

獨中和堂東南頗下瞰海門洞視萬里三伏常蕭

然也紹聖元年六月舟行赴嶺外熱甚忽憶此處

而作是詩

忠孝王家千柱宮東坡作吏五年中中和堂上東南頗
獨有人間萬里風

中和堂

咸淳臨安志嘉定六年李埴中和堂記畧云始錢王鏐于其宮作堂名閱禮本朝至和中

咸敏孫公沔來守此土易名中和守居負鳳凰山堂跨山憑高蘇公嘗謂下瞰海門洞視萬里觀覽之傑抑可想見西湖游覽志中和堂在鳳凰山下暑月最快

慈湖夾

一本作
峽訛

阻風五首

捍索桅竿立嘯空篙師酣寢浪花中故應管蒯知心腹
弱纜能爭萬里風

慈湖夾

元和郡縣志慈湖在當塗北六十五里陳克
東南防守利便云慈湖夾在太平州界至建

康七十五里石季龍寇歷陽趙嗣屯慈湖又蘇峻敗
司馬流于慈湖即此○慎按本集晚至巴河迎子由

詩云聞君在磁湖乃大冶縣之道士泝亦名
磁湖磯非此地也詳見黃州卷中讀者辨之

此生歸路轉

一作愈

茫然無數青山水拍天猶有小船來

賣餅喜聞墟落在山前

我行都是退之詩真有人家水半扉千頃桑麻在船底

空餘石髮掛魚衣

石髮

酉陽雜俎南中水底有草如石髮每月三四日
始生至八九以後可采食及月盡悉爛似隨月

盛衰者

日輪亭午汗珠融誰識南訛長養功暴雨過雲聊一快

未妨明月却當空

南訛

困學紀聞春言東作夏曰南為皆是耕作營為勸農之事孔安國強讀為訛字雖訓化解釋紆

回今史記

作南訛

卧看落月橫千丈起喚清風得半帆且並水村欹側過

人間何處不巉巖

蘇詩補註卷三十七